

Топ жарып жүрген жас спортшылар

М.Әуезов атындағы Оңтүстік Қазақстан университетінің студенттері спорт додаларында топ жарып жүр. Осылайша жас өрендер оқу ордасының ғана емес, тұтас елдің мақтанышына айналып отыр. Соның бірі – көршілес қырғыз елінде өткен «Ат үстіндегі күрестен» әлем чемпионы атанған Мұхаммеджан Жанбатырұлы. Қырғыз елінде өткен тартысты долада 6 спортшы ел намысын қорғады.

Ат үстіндегі күрестен жастар арасындағы әлем чемпионатында Қазақстан ұлттық құрамасы командалық есепте ІІ орынды иемденген еді. Мұхаммеджан Жанбатырұлы ат спортына бала кезінен қызыққан. Өрі әкесі де осы саланың білікті маманы. – Кішкентайымнан ат спортына қызықтым. Әкем – осы салада еңбек сіңірген жаттықтырушы. Кішкентайымда жаттығуларға қатысып, қызығушылығым басталған. 13 жасымда ең алғаш аударыспақтан облыстық жарысқа 60 келі салмақ дәрежесінде барған болатынмын. Аға-інілі бауырлар жарыста бір-бірімен шыққанда ағасына жол беріп жатады ғой, бізде керісінше ағам маған жол беріп, алғашқы жарыста чемпион болып қайтқанмын. Кейін дайындық күшейе түсті. Алғашқы бапкерім және қазіргі таңда да жеке бапкерім әкем Жанбатыр Бекмусаев, – деді Мұхаммеджан Жанбатырұлы.

Мұхаммеджан қазіргі таңда аударыспақтан Қазақстанның 3 дүркін чемпион атанып отыр. Оның ең алғашқы үлкен жарысы 2021 жылы Алматы қаласында өткен болатын. Сол жарыста 69 келі салмақ дәрежесінде алғаш рет Қазақстан чемпионы атанды. – 2022 жылы Көкшетау қаласында 65 келі салмақ дәрежесінде 2-рет Қазақстан чемпионы атандым. 2023 жылы өзіміздің Шымкент қаласы орталық атшабарда жастар арасында өткен жарыста 68 келі салмақ дәрежесінде жеңіс кө жетіп, осылайша Қазақстанның 3-дүркін жеңімпазы атандым. 2023 жылы қыркүйек айында, Қырғызстан елінде Ыстық-Көл, Чолпан ата жерінде өткен «Ат үстіндегі күрестен» әлем чемпионы

атандым. Біздегі дайындық жыл он екі ай болады. Жеңіс оңайшылықпен келмейді ғой. Әуелі Алла, үйдегі ата-ана, бауырларымының қолдаумен, тынымсыз еңбектің арқасында жетіп отырмын, – деді Мұхаммеджан Жанбатырұлы.

Чемпионның алдағы мақсаты – әлемнің спорт додаларында елдің көк туын желбіретіп, мақтанышына айнала беру. Аударыспақ спортының болашағына үлес қосып, жеңімпаз атану. – Менің аударыспақ спортындағы мақсатым – «Көшпенділер» ойыны, «Азия» чемпионаты, «Әлем» чемпионаты, Халықаралық дәрежедегі жарыстарда жеңімпаз болу. Қазақтың көк туын көкте желбіретіп, қазақ елінің атын әлемге таныту. Жаттығуды тоқтатпаймыз, – дейді ол. Күш сынға түсетін спорт түрі – пауэрлифтинг. Бұл спортпен әуес жандардың саны өте санаулы. Себебі, үлкен күш пен жаттығуды қажет етеді. Осындай спорттың ауыр түрімен айналысатын М.Әуезов атындағы ОҚУ студенті Абдурахман Абдурашидов, пауэрлифтингтен әлем чемпионы.

Бүгінде Әлем чемпионатында өзін мойындатып келе жатқан жеңімпаз. Жастайынан спортқа құштар бала зілтемір көтеріп түрлі жарыста бақ сынап келген. – Осы спорт мектеп кезден қызық болған. Спорт зал мектептің жанында орналасқан. Кішкентайымда мектептен шығып, сол спорт залға кіріп, қарап тұратынмын. Спортсмендерге қызыға қарайтын едім. Жаттықтырушы аға менен қатысқың келеме деп сұрағанда, қуанғаннан дереу келістім, – деді Абдурахман Абдурашидов.

Чемпионның алғашқы бапкері Садықов Кахраман – ҚР еңбек сіңірген жаттықтырушысы. Жас өреннің осы спортта жүргеніне 8 жыл болған екен. – М.Әуезов атындағы Оңтүстік Қазақстан университетін жақсы бағада, абыроймен бітіріп, пауэрлифтинг спортында тәжірибе жинап, жұмыс істегім келеді. Өзім секілді жас чемпиондар қатарын көбейтіп, әлемдік додаларда ел намысын қорғау – мақсатым, – деді Абдурахман Абдурашидов. Жас спортшыларымыз әлемдік спорт тартыстарында Қазақстанның туын биікке көтеріп, М.Әуезов атындағы ОҚУ мақтанышына айналуға. Спорт саласында осындай жеңімпаздарымыз көбейе берсе екен деген тілегіміз бар.